

中國通志集成

蒙古史志

中國邊疆史志集成

內蒙古史志

59

全國圖書館文獻
縮微復制中心

兵旣多柴米一貴耕牧無所實於生計無益原議
設副都統一員添兵七百名之處似應暫行停止
臣查獨石口外北行三十餘里卽係平原曠野土
木肥腴再五十里爲紅城子垣牆猶在襟山帶河
平疇沃衍遠勝於獨石口內再百餘里爲開平城
卽元之上都也城廣十六里有奇龍岡秀發灤水
迴環實屬形勝之區計開平紅城之間可耕之田
不下數萬頃再張家口外北行七十餘里爲興和
城西行百餘里爲新平城川原甚廣一望無際土

脉之肥過於開平計興和新平之間可耕之田亦不下數萬頃查有明之初常遇春逐元兵於漠北建大寧開平興和三衛東通遼碣西控豐勝爲北邊外屏後漸棄而不守尙論者有餘惜焉今熱河八溝皆大寧之舊境現議添兵駐防其豐川東勝境內歸化綏遠諸城均有重兵彈壓惟開平興和境內田疇未墾弁兵未設東西聲援似覺間隔

臣

詳度形勢所宜約計田疇所出大約開平可駐滿兵三千紅城子可駐滿兵二千興和城可駐三千

新平城可駐二千若開墾田土修葺城垣而廣爲駐防沃野千里控強萬騎左提右挈其於邊防大有裨益再國家八旗禁旅生齒日繁我

皇上聖謀遠慮屢爲旗人籌畫生計今幸有此閒曠地畝若令民人耕種擇其近城之地平方寬衍者畫爲公田其餘皆爲民田每墾民田二頃者必令墾公田一頃民田以爲世業公田分給旗人得完租粟再加之以月給錢糧衣食自益寬裕且山場可牧平原可獵弓馬自益嫻習此實王道自然之富強

旗民久遠之長計也或疑口外聚集多人恐於蒙古滋擾諸城左右皆各旗王公大人牧馬之厰今墾爲田恐旗人有所不便又或疑天寒霜早恐其難於收穫山少林木恐其艱於柴薪凡此疑難之處臣皆徧觀而細訪之口外之山綿亘千餘里名曰大壩凡壩內之田皆已招民墾種現徵錢糧此諸城之地逼近大壩俱係旗人牧厰與蒙古無涉旗厰之外乃太僕寺遊牧之地遊牧之外乃察哈爾居住之處察哈爾乃爲內扎薩克地方彼此隔

遠無由滋擾八旗牧廠所佔甚大多有餘閒可以
併省又遊牧之地方數千里割其一隅即可充給
至柴薪稍遠未嘗缺乏且壩內諸山多有產煤之
所若招民開採自可足用臣於三月十三日在獨
石口草芽未青十四日至紅城子青草長大一寸
氣候可以春耕開平城外隴畝猶存礮碓尚在若
非種植何以有此興和地氣較暖於開平其爲可
以耕種必無疑也臣之愚意仰懇

聖恩於今年秋間特簡王公大臣前往開平興和諸城境

內查閱各旗放青之馬共有若干約需牧地若干
將舊日所分牧地通盤計算可併者併之可省者
省之可兌給者兌之務使牧廠之地與耕種之地
疆界分清不致混淆

臣

於明春飭地方官招民墾

種遴員前往經理區畫三年之間田疇可以盡闢
然後漸次修葺城垣蓋造房屋通商惠工約計五
年百物皆備然後派撥滿兵前往駐防則凡邊之
外皆成樂土往駐之人自各便安天地之氣與人
相通人烟既聚則天氣益暖天氣益暖則田疇益

闢田疇益闢則駐防之兵可以陸續增添然則其所益於九邊之防維八旗之生計者億萬斯年而未有已也

承德府志卷四十九

承德府志卷五十

藝文三

議

漢

論匈奴保塞議

侯應

周秦以來匈奴暴桀寇侵邊境漢興元被其害臣聞北
邊至遼東外有陰山東西千餘里草木茂盛多禽獸草
木冒頓單于依阻其中治作弓矢來出爲寇是其苑囿
也至孝武世出師征伐斥奪此地攘之于幕北建塞徼

起亭隧築外城設屯戍以守之然後邊境得用少安幕
北地平少草木多大沙匈奴來寇少所蔽隱從塞以南
徑深山谷往來差難邊長老言匈奴失陰山之後過之
未嘗不哭也如罷備塞戍卒示外裔之大利不可一也
今聖德廣被天覆匈奴匈奴得蒙全活之恩稽首來臣
夫外裔之情困則卑順強則驕逆天性然也前以罷外
城省亭隧今裁足以候望通烽火而已古者安不忘危
不可復罷二也中國有禮義之教刑罰之誅愚民猶尙
犯禁又况單于能必其衆不犯約哉三也自古中國尙

建關梁以制諸侯所以絕臣下之覬覦也設塞徼置屯戍非獨爲匈奴而已亦爲諸屬國降民本故匈奴之人恐其思舊逃亡四也近西羌保塞與漢人交通吏民貪利侵盜其畜產妻子以此怨恨起而背畔世世不絕今罷乘塞則生嫚易分爭之漸五也往者從軍多沒不還者子孫貧困一旦亡出從其親戚六也又邊人奴婢愁苦欲亡者多日聞匈奴中樂無奈候望急何然時有亡出塞者七也盜賊桀黠羣輩犯法如其窘急亡走北出則不可制八也起塞以來百有餘年非皆以土垣也或

因山巖石木柴僵落谿谷水門稍稍平之卒徒築治功費久遠不可勝計臣恐議者不深慮其始終欲以壹切省繇戍十年之外百歲之內卒有他變障塞破壞亭隧滅絕當更發屯繕治累世之功不可卒復九也如罷戍卒省候望單于自以保塞守禦必深德漢請求無已小失其意則不可測開外裔之隙虧中國之固十也非所以永持至安威制百蠻之長策也

唐

駁宋慶禮謚議

張九齡

慶禮在人苦節爲國勞臣一行邊陲三十年所戶庭可
樂彼獨安于傳遞稼穡惟艱又能實于軍廩莫不服勞
辱之事而匪懈其心守貞堅之規而自盡其力有一于
此人之所難况營州者鎮彼戎夷扼喉斷臂逆則制其
死命順則爲其主人是稱樂都其來尙矣往緣趙翽作
牧馭之非才自經隳廢便長寇孽故二十年間有事東
鄙僵尸暴骨敗將覆軍蓋不可勝紀大明臨下聖謀獨
斷恢祖宗之舊復大禹之迹以數千之役徒無甲兵之
強衛指期遂往稟命而行于是量畚築執鼙鼓親總其

役不愆所慮俾柳城爲金湯之險林胡生腹心之疾蓋
爲此也尋而罷海運收歲儲邊亭晏然河朔無擾與夫
興師之費轉輸之勞較其優劣孰爲利害而云所亡萬
計一何謬哉及契丹背誕之日俱我犄角之勢雖鼠穴
自固而駒牧無侵蓋張星彼都繁賴之力也安有踐其
迹以制其實貶其諡以詢其虛採慮始之謗聲忘經遠
之權利義非得所孰謂其可請以所議更下太常庶素
行之迹可尋易名之典不墜者也

案唐營州都督府初治柳城扼制奚契丹

武后時爲兩蕃所攻移治漁陽元宗時奚契丹款付欲復治柳城宋璟固爭不可獨慶禮以爲利乃詔爲使築

城纔三旬畢九齡所言專指營州築城事故錄於此是
篇曲江集未載 欽定熱河志從舊唐書宋慶禮

傳錄出所云張星彼都蓋張皇之譌因初議慶禮諡
者爲太常博士張星本傳前後俱有張星字而誤也

記

遼

釋迦定光二佛舍利塔記

僧慧材

竊聞三千化寶百億尊復往之迹以無垠方便之門
而莫限應願榮辭于天界權儀降誕于王宮孜孜而示
倦龍庭默默而優游鳳苑顰眉 闕 返嚴駕驂迴老病死
苦以因觀法報化身而是慕奢華涕厭午夜逾城苦行